

淵

于

集

澗子集

文下目錄

恭擬 穆宗毅皇帝歲暮祭文

恭擬 孝哲毅皇后歲暮祭文

恭擬 孝哲毅皇后二週年祭文

恭擬 惠陵饗殿安奉 神牌告廟文

恭擬前工部尚書李鴻藻之本生母姚氏祭文

恭擬原任伊犁將軍明緒祭文

恭擬原任鑲黃旗漢軍都統春佑祭文

恭擬原任福建巡撫李殿圖碑文

恭擬原任閩浙總督季芝昌碑文

恭擬原任伊犁將軍明緒碑文

恭擬原任鑲黃旗漢軍都統春佑碑文

恭進光緒二年起居注序

恭進光緒八年起居注序

送顧皞民觀察之官直隸序

汪小樵封翁六十壽序

陳子良先生五十壽序

李肅毅伯相國太夫人八十壽序

顏母李太夫人七十壽序

李黼堂中丞五十壽序

李母徐太夫人五十壽序

陸星農觀察六十壽序

輦灣游記

游華灣後記

蘭駢館記

文下目錄 終

淵于集

文下

恭擬 穆宗毅皇帝歲暮祭文

義鞭倏駛悵鳳籥之回暄 軒鼎云遙展 龍衣而致
敬緬節序於秋霜春露物候潛移戴 豐功於 舜日

堯天 神靈宛在肅循典禮用展悃忱欽惟 穆宗

毅皇帝 智勇表邦 中和立極敬 天法 祖鴻庥

枕被八紘 緯武經文駿烈式昭六幕 仁孝耀鉤鈐

之彩錫類推恩 緝熙垂盤帶之銘崇儒重道 冲齡

踐祚 天威遠紹 景陵 實錄編年星紀上符 憲

廟屬藐躬以神器繼序維艱竭誠慤於崇筵愴懷莫釋

諱辰展奠廿五日兩激悲酸吉亥蠲饌億萬姓同深感

泣溯 謨猷之巍煥弓劍長留仰 靈爽之光昭羹牆

若接於戲紀書正之麟筆年華瞬近三暮撫錢歲之犧
尊時食虔申九獻伏維 敬格鑒此茲芬

恭擬 孝哲毅皇后歲暮祭文

黍律潛吹悵珠躔之昬轉 椒塗在望瞻 黼嬰而云

遙夙欽 懿範於長秋輝增禴翟敬舉明禋於除夕愴

絕尊曷用絜飶馨爰據悃悵欽維 孝哲毅皇后 安

貞應地 文定倪天作配 先皇著柔嘉於蘭殿承歡

聖母徵敬順於 萱闈蓋三年端媯汭之型稱述曾

頒 懿旨而百日攀 鼎湖之馭呼號下及編氓典溯

初元率臣庶而恭陳 璆冊禮崇大禘屆歲時而肅跽

璇幃德懋坤儀感深節序於戲蘭館舉迎春之典彌

切悲涼雕筵隆享臘之文冀昭旰饗 靈其敬格鑒此

微忱

恭擬 孝哲毅皇后二週年祭文

維光緒三年歲次丁丑某月朔越某日嗣皇帝臣謹昭
告於 孝哲嘉順淑慎賢明憲天彰聖毅皇后神位前
曰徽流彤史坤元乃順承天淚滴金仙節序又逢諱日
溯椒途之遺範再奠犧尊悵蘭掖之凝塵兩周鳳齋禕
榆空設牲醴虔陳欽惟 孝哲毅皇后 惠問川流
芳猷淵塞敬修紛悅上承 聖母慈仁度表珩璜默贊
先皇治化詎意湘波落月長傍蒼梧竟占織室飛星
齊歌素柝堯封語鶴已悲臘鼓之重更幽館親蠶不覺
春衣之又薦於戲禮申亞獻璇宮之愴感同深候屆再
期玉宇之靈輝益閤式循彝典尚克歆承

恭擬 惠陵饗殿安奉 神牌告廟文

虞主練主棲神準於春秋乾元坤元正位同乎 天

地既闕 橋山之弓劍敬游原廟之衣冠儻氣潛通比

殷室綴重之義茲芬常薦循漢陵設座之儀欽惟 穆

宗毅皇帝 孝哲毅皇后 德備聖仁 恩同幬覆自

沖人之嗣服斤土虔修依 皇考而宅靈神奉環拱

珠邱永奠 寶祐常函 熙號恭題準蚪經而書漆迎

精返 御肅鸞路以鳴和仰維 在天之靈宜弭排雲

之馭 闕宮地近伏社臘爰置祠官 太室香升蒸嘗

禘用修典祀 玉衣石馬百神朝 巍巍翼翼之靈

禹窆 湯宮萬葉卜子子孫孫之瑞祗陳 黼几式絜

雲疊鳴呼憑依昭明德之馨制稽桑粟往返表如疑之

色淚灑松楸莫罄瞻依尚祈 駸格謹告

恭擬前工部尚書李鴻藻之本生母姚氏祭文
彤管貽芬訓迪夙推夫賢母丹綸煥采顯揚曲慰夫大
臣爰崇申奠之儀特厚飾終之典爾工部尚書李鴻藻
之本生母姚氏克嫻壺範允協閨箴修筐筥之誠敬孚
蘋藻表瓊璜之度節勵松筠教令子以義方贊中朝之
機要副勛勤於樞政倍矢葵忱知恪授夫楹書時劬荻
畫封崇一品聿膺翟第之榮壽越八旬方衍鶴籌之算
長舒萱蔭兩貫芝擗御書荷 先帝之褒延齡錫類人
瑞致高年之嘏如意養蘇柘館功多表彰施於象服蘭
陔春永鈐福壽於龍章朕曾因奏對垂問興居冀爾身
福履永綏庶爾子謨猷時告遽聞溘逝良用軫傷恩勤

並萃於一門重昭優眷淑慎允孚夫四德宜播芳徽內
帑特頒崇筵式醑豫計歸途而示恤庶期幽壤之永歆
於戲體人子之至情哀榮兼備承國家之異數忠孝攸
資靈爽有知苾芬來格

恭擬原任伊犁將軍明緒祭文

朕惟閫外宣威執干戈爲社稷之衛行閒效命聽鼓鼙
思將帥之臣苟完大節以致身宜錫明禋而申奠爾伊
犁將軍明緒探竒籀史論秀虞膠立肺石以平反蒲鞭
折獄典牙籌而司權箠節當關熊軾頻移豸章用錫伊
商甘羽理刑騰隴右歌謳渭濁涇清布政起周南治化
馳羽檄於龍堆馬邑俾副戎旃列頭銜於鳳閣鸞臺仍
參武略銀鷁之妖氛屢遏金魚之懋賞攸頒心簡

欽承特昇冠軍重寄膚功克奏旋躋都護崇階方期繪
象於雲臺何遽全忠於雪磧傳塞上存亡之信鴈帛銷
沈錄睢陽戰守之功螭綸渥沛忠節榮褒夫華袞馨香
潔侑以崇筵於戲浩氣常存猶擁雷車而助戰忠魂不
朽儻隨露布以來歸賊即肅清靈其歆格

恭擬原任鑲黃旗漢軍都統春佑祭文

朕惟威宣禁旅龍垣重鈐轄之權恩賁宗臣雕俎式馨
香之報生旣克承眷注沒宜兼致哀榮循考葬章寵頒
醴犇爾鑲黃旗漢軍都統春佑老成著望勤慎趨公麟
定分支鷓冠入選參旗井鉞武備班崇雲罕星旄鑾儀
典肅旋晉官於祕閣庸掌禮於陪都綜文部武部以司
銓歷左軍右軍而建節衣冠萬國職方逾鴈磧而西鎖

鑰九關開府越狼河以北勲高都護衛總鉤陳轡縮飛
黃冠影孔翠領度支雜稅權算無苛總天策行營戎容
倍整內則班陪豹尾外則隊領虎牙疏皇屬之支源銀
潢誼篤監尚方之服御王府珍儲方期錫福長膺詎意
遺章驟告 御書 御服既寵賚於 先朝賜綬賜金
宜優加以異數恩澤下推任子莫筵特遣親臣於戲典
重易名允副褒嘉於華袞恩深眷舊庶幾歆感夫溫綸
靈其祇承享茲芬苾

恭擬原任福建巡撫李殿圖碑文

朕惟國家褒錄前勞闢揚碩德非第恪遵成憲實堪矜
式羣僚是以太極增官首敘神龍忠讜建炎賜諡特崇
元祐名臣輿論允符彝章用沛眷舊勲於海徼俎豆延

芬下新詔於里閭碑林增色爾原任福建巡撫李殿圖
持躬孝謹勵志忠貞錫笏傳家屬名良之後裔簪毫稱
職躋侍從之清班鳳綺頻叨豸冠進列燕臺選駿迭預
文衡鄂渚征駢復持使節輶軒問俗旋乘桂海之軺鐘
鐸求言屢上柏臺之疏迨被黃門法服命司赤水軍儲
甘羽伊商遂騰凱唱羌屯洮砦用備邊防鳴鞭共撫瘡
痍飛檄首彈貪猾獻氊裘而歸義馬有留人立肺石以
平冤任皆名子屢察廉於隴右爰陳臬於閩中獄恤羈
留院開參酌屹南山而判牘下東海以矜疑籍姓氏數
千人不勞鉤距引春秋三百事足備爰書晉綰藩條宏
宣政典行社倉而穀湧謹臺庫而錢流役牛鋪馬之徵
朝聞夕罷封鮓懸魚之操吏畏民懷甫膺祭戟於皖江

復沛絲綸於嶺嶠巖疆坐鎮開府重來化洽膠庠恩周
鞮寄布教以澄吏治恤忠以奮我行復鄒魯於海濱爭
消雀角翦孫盧於島上威靖鯤身去而民欲攀轅沒則
社爭繪像講堂垂訓幾偕常袞同傳官舍留題咸以李
綱相況在衆口交推遺愛而朕心丕念老成曾蒙 純
廟褒嘉足徵治行敬溯 仁宗訓諭親獎廉明敕下所
司詳稽故事諡爲文肅表厥忠勤於戲恩永沐夫四朝
澤長緜於百世刊碑得請遠追仁軌之勲名刻石紀功
上邁韋丹之德政欽承休命式煥芳猷

恭擬原任閩浙總督季芝昌碑文

朕惟卓茂以先朝公輔逮嗣服而圖形居易爲長慶儒
臣迄大中而追諡果其內參機要外厯疆圻克副殊恩

宜光鉅典前勞足錄旣永勒夫旂常衆論允符用特鐫
諸鏤琬爾原任閩浙總督季芝昌挺節南邦簪花上苑
甫入承明之直旋邀 特達之知賦奏凌雲筆工畫日
屢膺上第十聯親紀御屏懋獎奇才雙炬導歸瑣院宮
坊敷厯台閣迴翔入則迭領冰銜出則親承天語江流
上下古鏡獨攜山鎮東南征輶徧厯才羅房杜見焚香
薦士之忱文擅呂蘇叨賜宴延英之典泊乎洵躋清要
進判度支米廩封椿革宋室監倉之弊鹽池訂稅權燕
都煮海之謀繼因使越之行兼奉觀河之命五釐減則
特設綱官六計察廉嚴繩墨吏熬波出素富溢於金渠
立庫延資數充於玉府更復奉筵定法捷竹陳歌津尉
堰丞冗員悉汰金堤水藏勞費不增旣屢告夫嘉謨遂

特隆以大任參旗并鉞出撫崇藩虹靺霓旌召還中禁
司徒因而咨契御史無以易堯愴陳西序之珍赤刀大
訓旋備南疆之寄典蓋麾幢績課循良流嚴清濁遣山
松於浦口卒困盧循叱梅錄於坐中無慚景略朝陞方
資爲心膂泉石乃中於膏肓綠野乞歸黃壚告痛而話
海雲之隱見宿德交推辨井水之甘鹹清名弗替疆吏
據之上請朕心彌切追思昔或從庾俊之謙未頒賻絹
今宜舉士元之例爰沛恩綸下詔褒揚易名文敏於戲
洗壺頭之瘴璽書追念前勲刊峴首之碑石刻常留遺
愛欽予時命貽爾後昆

恭擬原任伊犁將軍明緒碑文

朕惟星垣騰上將之芒神歸箕尾天府煥太常之績銘

勒鐘彝惟其果毅成仁從容蹈義斯旣書之銀冊尤當
壽以丹珉爾伊犁將軍明緒秉性堅貞賦材奇特舉茂
才異等造肄竹刑以比部郎中出監攤稅分麾江右旋
典郡於榆關察吏湟中爰晉階於柏府逮二陝之藩條
兼攝適三邊之軍事方殷俾副旌麾實參帷幄班躋鷁
鷺徽猷閣兼領容臺隊統貔貅受降城直臨準部蔥嶺
之軍符特寄花門之逆燄幾燔荷 先皇賜服之恩純
黃衣會肅都護防秋之令大白旂飄謂烏孫足絕天驕
何虎將反淪邊徼全家義烈士一炬而同焦絕域沈埋
血三年而猶碧聞而軫惜沛以恩施嘉其馬革之全忠
宜勒螭文而示獎諡之忠節昭厥勲勤雖英姿已委於
沙場而毅魄終依於華表於戲抗回紇無厭之請行從

瀚海刊碑酬蓋臣未竟之懷合傍祁連起豕欽茲茂典
貽爾後昆

恭擬原任鑲黃旗漢軍都統春佑碑文

朕惟虎賁列仗資翼衛於重臣麟閣擢分眷勲勤於耆
宿賢念舊動騎箕之感斯飾終垂刻石之文溫綽攸頒
貞珉永煥爾鑲黃旗漢軍都統春佑持躬謹愨秉性忠
貞領七萃以宣威扈六飛而侍直武庫克修戎備和鑾
倍肅威儀中禁依光韜鈴夙裕上京典禮圭幣虔陳旋
貳銓曹俾班軍政化綏象寄輯藩國之共球險控烏桓
授邊方之節鉞速入鉤陳而翊輔屢隨天畢以前驅邦
賦兼權宗盟是掌備周廬之宿衛翠羽榮叨綜內府之
機宜丹心永矢方深倚毗遽告淪徂襚贈恩隆既綸絲

之渥沛旂常績懋宜竹帛之長垂曩厥生平諡之誠恪
於戲班森蘭綺顧鵷行而不念老成氣肅松楸勒螭篆
而式昭曠典欽茲寵命貽爾後昆

恭進光緒二年起居注序

伏惟 皇帝陛下治闡金繩 政齊璣鏡 撫辰凝績
承 列聖之詒謀 恭已垂裳稟 兩宮之至教 握
春規而契秋矩 松棟延暉 憲坤典而式乾文 薩
圖席瑞八紘欽醴措民生於康樂和親六幕敷膏 建
皇極於蕩平正直 臣等職司記注志切論思恭纂 光
緒二年起居注成有舉必書事繫日而日繫月以時爲
紀正次王而王次春欽 聖學之心源幾窮蠹測遵史
家之體例勉效麟編仰見我 皇上巽命揚庥 泰符

輯瑞 勵宸修於殿閣沃心端養正之功宜 聖訓於
橋門讀法重始和之令繇是儀隆 講幄時召疑丞典
備 經筵特崇耆碩 簡清班於瑣闥秀毓皇條循故
事於容臺 恩推聖系呈圖積慶 錫公姓以嘉名致
綖飾終恤宗支之祥耦侍威姑而篤孝 奎藻旌閭瞻
近族以上腴 雲章表里松筠勵操璇閨盡發幽光結
總施仁玉帳頻霑 闈澤 宣室重邀夫前席欣廢滯
之全搜 明廷許試以他題軫孤寒之遠涉更復淨輪
毀教隱除天士地公使節宣風直達星源月竈五斗破
師君之道 誥布虎門千檣揚將率之威氣消蠶市
皇上之執中建治有如此者懿夫 圓穹 方澤虔陳
蒼璧黃琮 月坎 日壇敬整紫煙朱火皐彫禾而

祈穀黛耜昭誠歛瓊管以常雩紺筵示絜特祀羣祀
明禋徧五時六宗致齋散齋定義重上丁先甲是以
流安竹箭澄瀾利黃鵠之行江越松花治水顯黑龍之
瑞靈貺聿鑄玉券聖井噓甘威光上擁珠旌危城捍患
禪宗三竺潮音亦受民祈臣節七朝河伯遂加王號賴
神庥而錫福蘭俎同陳賜宸翰以酬庸芝榜特賁
皇上之修祀祈康有如此者郊堂合鬯燎柴既報
靈祇廟室薦清馨秬更升闕寢祠部以禮昭典重
恐終獻之過勞聖人以氣感焄蒿必先期而致愬時
交禘禘開沖幄以舒薰祀舉烝嘗肅嘉籩而上食令
辰貢耐福黍明粢慶節陳珍柔毛剛鬣堯陵在望紀
功碑敬護螭珉軒鼎非遙興聖節仍揚龍袞修作異

高靈之館 命少府以董工 尊藏邁昭應之宮 諭
靈臺而涓吉至於 椒宮鳳吹祝 萬壽之無疆 萱
幄鸞笙際 四旬之行慶問 安視 膳仰副 慈懷
顯翼扇魏武崇 徽號 昭和 昭豫視明德之德為
尊 莊敬 莊誠軼宣仁之大 冊亭珠飾 璽
室綈封 錫類推仁徧及璫官銅史舉儀 頒賞下周
輿尉殿丞 皇上之達孝尊 親有如此者重以瑞雪
逾期甘霖靳澤恐茅檐之呼癸 詣華殿以 祈辛筮
吉初春書成閏夏始 遣親藩而恭代未獲祥雲繼張
御蓋以誠求猶遲嘉澍 三壇舞羽香雲將逮驪洲
四野操蹄膏雨遂盈雉隴然且嚴周官之八柄戒飭臣
僚鑒洪範之五行 修明政體籌賑借延資之庫 廣

給膚金 省刑開執法之庭平施肺石柏臺獻疏如披
鄭俠之圖米廩封椿分造黔敖之粥兩 蠲租於畿甸
不勞勸糴近郊一 振貸於晉疆奚翅汎舟及絳災沿
玉筍極鴈戶於章門功奠金隄洩鯨波於閩海月廩恤
淮壩之困江左餽鍾風潮扶羅刹之傾浙西彎弩普行
糜於班白歌挾鑛於窮黎推農夫之食以九人必鋤非
種下社倉之法於諸郡俾蓄餘糧謠言偶似傳籌診袪
黑眚儆戒猶同徇鐸 敬繹丹書 皇上之愛民勤政
有如此者時則 玉鏡宣光 珠囊炳慶前英後傑
作人遠紹周京大法小廉考績會符 虞陛 樞廷翊
化親賢首荷 褒嘉鈴閣銘勲將相並邀甄敘槐棘恪
循舊列絳幘趨朝茅茹彙拔羣材 丹毫注籍且也懸

車引疾俸錢猶視王官茹刃捐軀俎豆獲儕疆吏憫蓋
臣之勞瘁科第詒孫 鑒碩輔之忠純勲階延世 賜
卹優於藩國不遺四姓功侯易名眷厥卿僚並逮 累
朝宿德于焉 芝綸贊治御史臺進直 螭坳卉服輸
誠尚書省兼司象譯戟府遙臨蜀道 特給銀驄戈船
睠念海疆常嚴鐵牡奠鼇遼左弟昆遞攝蜺旌迴馭楚
中先後重持虎節秉鉞至泰山而遠更宣瓠子之防揚
麾經洱海以南旁據桂林之險祠崇金馬銅山關圍法
重輕溪過石犀火井酌醴章利弊集羣仙於史局獸炭
熏鑪 賞三畧於臣工鶴綾裘篋丞尹率先輦轂宮坊
洵領圖書內而司李奉常鸞班互轉外則開藩陳臬熊
軾同移縣譜州箴猶冀挽回積習羅鉗吉網豈容濫引

刑章原情則一肯稍寬糾謬則十愆必做鳩羹察枉赭
衣冤雪於禹航身繡觸邪白簡威行於益部詐稱漢使
坐獄是懲私取溫田繚垣以守匿盜則令嚴破柱名王
亦列彈章稅商則數謹算緡下隸敢持會計恐曠槐堂
之職郡國徵還難膺薇省之司翰屏受代痛繩墨吏請
纓未許從戎裁汰冗員解綬務宜歸里三耦欲分棚校
藝試典難違一衿以納賂希榮官邪罔貸弊鈎網部禁
增亭戶鹽籌法懍稽臺密覈倉曹米價給餼課夫博士
烏府颺言通經勵厥人師鱣堂式範巍巍乎 皇上之
敷允澤而 奮乾綱也若夫三宅儲英 四門籲俊覆
試益昭公允磨勘倍著精詳 慶榜宏開禮闈丕啟選
文壇之繡虎主試量才肅供帳於儀鸞侍郎貢舉風簾

分校五經爭射甲科奎斗高騰十卷先呈 乙覽迨題
名於雁塔復角藝於 龍墀兆炳芙蓉克副 上心忠
孝班聯桃李式彰 聖治文明畫鳳諾以呈奇玉苗璿
萼習龍威而闡祕倉雅籀篇青纂編摩蔚清華於芸館
緇帷教董升藹吉於梧岡秀擢杏林芳擧桂窟 簡使
星而明試英蕩將頒合卿月以敷陳輶軒彌重革芬鳴
鹿 恢珊網以羅材芹藻揚鸞綰金衡而造士慎生員
之增廣恐濫吹竽厚邊地之裁成俾勤鼓篋闡分隴右
譜伊商甘羽以同和弊剔川中進馬賦雄文而勵行飭
關防之嚴密學校斯端屏僉從之喧囂場規必肅詞苑
既特蒙補試耆儒復優予崇銜 德化內敷 威稜外
播澤宮大射熊侯矜貫革之能禁闈前驅虎旅誌彙弓

之樂侍 九乾而星拱衛領鉤陳統七萃以雲屯尹森
環列豹槍夾仗勤翼輔於周廬雀弁隨班備傳宣於
清蹕駐藏則西經鴈磧萬里弓刀視師則北越狼河八
關鎖鑰牙璋大閱整四省之軍容羽檄兼程重三邊之
戎政卒伍悉修組練彈壓荆襄將臣夙習韜鈴奠安江
漢然且嚴申紀律力塞盜原橫海無功就收戈仗籌邊
不效立奪麾幢游騎濫招專閫即加褫削偏師猛進踰
溝未許遷延用能蘭艾增旃萑苻銷鏑歌金饒而奏捷
滇徼肅清立銅柱以告功洞蠻帖伏花門授馘春耕而
銀鷓無聲蔥嶺攻心秋獮則紫駝齊出直抵車師後部
駕班超絕域之功盡平袍罕諸羌即充國屯田之衆大
漢頭馳露布虎子全搜遐荒共震 天戈烏孫將下

璽書褒答行看圖畫於雲臺鼓蓋先頒預授機宜於
雪塞赫赫乎皇上之炳文謨而昭武烈也是蓋無
偏無黨道洽疇圖所由惟幾惟康德流韶濩徐條
荆幹九州之貢賦胥呈水賚山琛萬國之共球畢集普
謳歌於寰海咸欽聖德如天勤召對於臣鄰猶覺
沖懷若谷遐稽往牒遠並勲華爰勒成書式符謨
訓臣等才慚柱史紀準竹書預邇英簪筆之班敬仰
宵衣旰食輯貞觀題屏之要恪循月緯年經小策大
方典則常昭雲漢左言右動輝光永炳日星

恭進光緒八年起居注序

竊以惟皇建極法兩大以垂模至聖握圖順四時而成
化故中和應於位育時物驗其行生遠溯前徽備光史

冊不有記注曷煥 宸猷欽惟我 皇上續武繼文
重熙累洽 化光日月八埏咸囿於 照臨 道贊乾
坤九域同歸於 運量凡一時之 言行皆百世之儀
型雖 帝治垂裳居所凝 紫宸之極而史臣載筆摛
詞增彤管之華有舉必書敢曠厥職且夫春秋遞嬗者
大造之所以宏化育也恩威並用者郵治之所以大裁
成也是以雷霆雨露悉爲覆載之恩德禮政刑盡屬陶
鈞之具伏見 皇上御極之第八載於昭駿烈 有赫
鴻猷府事咸底於修和 天人益徵其感應雖紀 化
功之美備莫罄名言而仰 至意之勤求敢陳大略夫
圖治之道首肅官常察吏之方先嚴黜陟 皇上明罰
敕法酬庸賞功 威克厥愛而非苛 寬以濟猛而不

濫 慎三載之考績進退臣工 勵百職之攸司激揚
流品登白簡者必嚴推勘樞臣亦雖重而難寬縮墨經
者深荷 慰留疆吏可移忠而作孝肅臺綱則諫院禡
長官之秩覈薦牘則勲臣被吏議之嚴 九重之誥誠
頻頒 一德之交孚有自而且 闕門額俊開蕊榜以
求賢 訓俗型方 命輶軒以視學周甲與南宮之宴
沛恩綸而禮重崇儒陳庚談東觀之經勵宗學而典
隆教胄又復波平東海策勲班懷遠之師管慎北門恤
士倣屯邊之將似此 耿光大烈無非 聖德神功蓋
惟有 知人善任之明斯克收位事惟能之效至若
愚被無疆 德施有截圖陳無逸 軫稼穡之艱難
念切如傷 問黎元之疾苦疑獄已成而復鞠三尺條

嚴狂瀾既倒而能迴百川軌順時下恤刑之詔迭頒
博濟之仁陋巷冬寒發粟飽翳桑之瘠康衢日暖
授衣騰挾纊之歡偶值偏災益勞塵念慮鳩居
之未奠頌儲積於民曹知魚腹之猶枵減挽輸於
天庾更奉慈闈之懿旨特施減膳之殊恩節
用推仁播德音於函夏損上益下免進奉於中秋曲
體乎茅簷鍾鼐之微彌深夫黼座宵旰之意舉凡
愛民而勤政悉以贊化而調元用能澤溥黃輿
誠通蒼昊園丘方澤肅昭事而迓和甘社
稷農蠶奉明禋而呈瑞應朝夕致虔於二曜薄觴
潛銷春秋享祀於羣神靈承罔忒存誠爲物辛祈齋
肅於青壇儲祉慶年酉熟臚歡於赤甸香頌祕府

安瀾酬九曲之流額煥新題效順答百靈之貺偶示櫬
槍之警感 修省而立化無形永瞻景慶之輝際 盛
明而悉呈有象珍符徵應宇宙休和是雖玉檢芝封未
足揚其英茂珠囊金鏡詎能繪其光華蓋 夙夜宥密
之神原即一二日而可見而 宣著盛大之美實累千
萬牘而難窮迺 皇上謙德彌尊 淵衷益懋續承
家法 烈光昭繩 武之休稟受 徽音 孝治為立
政之本況復 天行不息 日進無疆 懷心矩以受
敷言丹書陳宸 謹德隅而勤典學絳幄橫經所由
第祿永康席純常於 景福 時幾交誌昭祐助於
穹儀臣等幸侍 彤墀常依 丹禁隨班豹值瞻無爲
恭己之休濡墨 螭坳援據事直書之例惟左言而右

動揄揚敢涉乎鋪張期月盛而日新纂述必臻乎賅備
竊願 明良喜起繼舉禹以賡歌 俞受敷施著典謨
而作則彌輝煌於載籍增玉書金簡之光永 昭示於
來茲媿鳳籙龍圖之盛

送顧皞民觀察之官直隸序

皞民爲郎十餘年不得意用護作 惠陵方上序功得
官將仕畿甸余與皞民交淡若水心斷爲金於其行也
不能無言乃舉酒而屬皞民曰勉之爲余盡一爵也夫
類均蓼蟲斯有可語之味律協變徵固無不諧之音余
與足下雖通介殊趣南北異稟自少而長所境乃同比
類感聲寧肯默默足下幼丁遭厄養繼母而負米僕亦
少涉艱巖恃吾母以識字覲面京國握手蕭寺勉舉父

訓則楹誥無僅存之語退述慈恩則笙詩有難補之什
謂君母陶太夫人雖復妻頗擇對德曜不恆弟能成名
暨先妣田淑人雖復妻頗擇對德曜不恆弟能成名
許武獨絕而晚婚均蹇於報幣受責互捫其撻痕此一
同也圍城之中有求不去聞道出走九死一生巢將毀
而甚之以風魚在池而殃之以火旃毛并雪頗用藥饑
葛帔禦冬久亦自暖滌器雜於庸保帶經行復賃作語
君瑣尾觸我瘡痛此二同也勞薪僅存朝籍忝注水曹
官冷郎宿爲之無輝天祿書窺太乙終於不下貲酒望
其折券安步居然當車重以長者交門車公樂坐人事
難絕臣飢欲死是則茹荼在口乃各喻其苦甘然艾炙
膚曾莫問其疾痛此三同矣嗟乎僕與足下門戶非第
一才品在四五使其錦衣吹笙重鼎累席久亦腐腸伐

性耳則知困餓相迫憂患之來實造物之至仁餘慶之
鍾我焉然而揉曲木者不累日銷金石者不累月蓬直
非性素染斯緇如僕者能薄材朽無益縣官珥筆奏事
分爲叨竊猶且當社割肉細君笑其太廉倩奴沽酒便
了真敢作惡退垂解嘲之篇入乏便宜之對此自瓠落
復何足道至於足下亦且詼諧取容搖手不得居無四
府之特薦出無司空之見留奉檄以親強作色喜入錢
爲吏難署右職非夫鴻鶴之志殆亦拙者之效耳雖然
使君愛才甯問米價燕人雖慧能歌麥歧傅之翼者終
戾於天矜其鳴者詎擯於野固知木毀於節乃鬼谷之
謬悠舌柔能存直老氏之元解足下勉之沙輕石重吏
自當儒鈴小鍾大物慎於鑄吾儕小人安往而不得貧

賤哉勗德揚名好相見也

汪小樵封翁六十壽序代

歲丙子司業汪前輩鳴鑾奉典試河南之命事既竣
弭節梁苑憑眺繁臺怦然曰吾父今年六十矣片雲孤
飛顧親舍其在下新陰初滿率門生而遠迎意者其許
我乎年丈則先以書抵豫曰皇華載馳非臣子來諗之
日也吉禘未舉非里閭奉觴之會也君言不宿無念我
為司業使旋既逾歲將謀介雅語人駿曰是舉也意難
違親禮若變俗亦有當於古歟人駿曰可哉一生統萬
老氏之指也貞下起元大易之詮也損益定律數起於
黃鐘乾坤撰策秘洩於太極然則酌斗祈耆之義杖鄉
益算之徵可得而述矣年丈瑠珠昭文蘅茝蘊烈練青

濯絳初服爰肇其功叩微彈宮太羹獨希其和祖朝議
公奇之有聖童之稱格男之目年十三命爲太年丈司
馬公嗣皇甫謐之出後愛若所生諸葛喬之承桃親爲
易字焉當是時江左壇坫方盛紐系相貫龍威穴其靈
寶駢臂世其儒宗江都繁露之篇不面而次受東海茲
茲之解枕膝而獨語年丈夕發滕笥朝承髻珠小同問
答迷高密者爲多中郎論衡見仲宣而盡畀劍利於淬
氣如龍然蘭謹所漸價匹馬矣吳笙舫侍郎視學浙江
蕤賓躍池夷則騰井漢廷童子許江夏爲無雙吳郡秀
才推叔開爲第一其華虬費錦績其學旭厯銳銀庸待
良木三變靈著五浴哉然而歸昌奇律非鯁俞勿能采
也天球重寶非遽除所能蒙也招搖之桂出山而不馨

女牀之鸞當風而有戢擲楯無所呪柱空壯斯則東方
罵鬼託諸嚙語西子駭麋著於繇曰固亦孤憤可篇牢
愁足賦矣而年文辯貞亮之聲坐謙虛之薦黃金散盡
貼跟趾於焦原清角知希羌療飢於泌水不知不愠君
子人歟比狼赤彗天鷲蒼出地遼東卓帽無家可依竈
北絳綃據牀以獻長鏡託命憶弟妹而悲歌采藥入市
問姓名而不答然且寫韻樓之本詰耦能詩預元亭之
草佳兒問字蓋白賁由晦而顯明夷遇難而貞者焉夫
大璞不雕胡輦乃輯爲瑞喬柯久鬱芝菌始舒其秀三
鱣集於講堂由伯起之道大八龍逼於象緯斯季和之
德尊司業幼稟義程長窮研閱臣朔待詔所誦何止萬
言士衡入洛問年不過二十琴震都市杖燃天祿文章

炳乎大漢刻畫必於先秦不知邕精選學喉衿實本祕
書冲上說文演贊端基浚長也年丈以戊辰之歲就養
京邸司業以庚午之秋銜命關隴斑蘭之奉自篤於中
園綺之操無慕於外故坂厯九折勗以忠臣而文成十
賚自署處士既賡感逝之篇益屏遠涉之帖王霸諸子
枚乘小妻古懽自娛智光爲上別墅孤山之麓煙波一
帆故園塔山之陽松蘿十里而扶風高士賃屋乃近皋
橋桐廬徵君築室自來吳下蓋志遐曠者入市而亦仙
性夷白者牽舟而如屋也所居廉讓之間自處通介之
際蚌盤象筆或報以詩鹿幘麕鞞輒委諸地留守適來
被道服而對酌生徒見役望縣門而卻步近揖甫里遠
引何山年丈三之矣况復柴桑雖達誠子之疏彌慎內

史當官到門之車必下每拜一命必垂一銘孫逖屢典
大科頗舉名宿戴逵前爲博士驟貳冑司而試院矢心
語昔年之辛苦庠均則古訂篆文之危疑不亦居華廡
而念困窮身江湖而心魏闕哉人駭曾因常調得爲密
坐叩攝生之旨以不動心易之是則以志帥氣鄒嶧之
所難言修道養壽龍門用以作贊宜其神遊大凝之宇
目窺晃朗之門菊天初蟹蓴波得鱸年文品顧渚之茶
致蘭陵之醕太學奉尊對江山而遙賀祭酒賜果納紳
帶而歸餉殆將攜白傅之篇編年長慶問狄尹之齒圖
形普明焉純嘏爾常康彊逢吉豈特合祖父孫爲觚紀
之丁字鐫六十一於譜例以辛翁也耶

陳子良先生五十壽序代

陳氏自大司寇望坡公以來世以忠孝著稱布政使弼夫公以辛酉歸里第我子良太夫子侍起居焉今年秋戚邨以太夫子暨林恭人年皆踰艾請介觴爲壽太夫子則不敢當某聞之躍然曰禕哉雅歌張仲之德不後於吉甫人稱子騫之言定論於宣聖天地盤礴之氣不生忠臣必鍾孝子非偶然也太夫子始生時祖司寇公乘驛車急楚獄風雪中成皇帝親解所御元狐馬樹下驛馳賜黑狸之壽千歲實眷者臣石麟之啼一聲迺誕英物謝賚之表猶濕弄璋之書適來名不待事義則非假子必肯構先天以命象賢祖適侍中袁賀遂字元服賞延於世始基之矣幼即愴定讀父書而必諾久益淹貫錄孝經而哀然母鄭夫人遘疾在危露禱乞代呼

天不聞愚極而智割臂再和雜藥氣而恐腥褻創不言
祖寢衣而殷矣彼孤臣臨難剖腹代白義宗勵操截耳
自誓厥軌雖異所事如一時年固未冠也然而宗族稱
孝輒聞之而跼躅陰雨撫癥猶摩挲而泣下何論其造
都南之塔野鹿相羣表瀧岡之阡淵驪來攫哉州郡累
辟姓名升於禮官丞郎列宿尉律世其家學意且鎔鑪
晉鼎竄削甫刑陳寵藏祖時律令鈇鑕悉除諸科延年
當先臣舊官坐臥輒易其處素無宦情乃決初服甫釋
橋門之禍隨挂元武之冠布政公備兵陝南理鹺山左
靡役不從焉旣解滇藩言歸海嶠居雒之叟始及五十
負牀之孫已參諸父趣辦嚴使就職太夫子甘天倫如
飴醴佩天爵爲珩璜不能奪也十餘年來田園不蕪朋

酒斯饗閩中饒山水螺州又世所稱溪山絕佳處晴來
則嵐光撲窗雨淨則松陰入座江波鏡平野色羅膩時
也荔紅可筐茗香未餅綠髮之叟支筇而來翠衣之女
盪槩相引有乘小車前者扶糜爲轡拂花閣輪羣曰此
布政公出游也或撰杖導屨或抱著膝上或斜坐車後
羣曰此陳氏德星聚也然則武夷君之兩幄何必幔亭
疏太傅之一門居然圖畫豈人倫一家之盛蓋昇平之
僅事焉性無他嗜惟好集古丁酉癸觚頡盤汲簡搜羅
不疲藏度者富篋銘眉壽之字奉高年而祝釐鼎勒孝
享之文述祖德而未寶閒則翰墨傳賞嘯咏申意南陔
不補入雅已笙屏風偶書守訓爲鑑所交如海豐吳方
伯道州何先生奉梨爲宗得攄益雋與紀始雅爲羣而

拜執友稱仁交游稱信亶其然乎林恭人亶淑華族儷
祥德門馨膳之絜幾於泉鯉自生旨味之薄甯獨糖蟹
不擾懋是婦德粹爲母教致福有基震虢虢以恐懼興
仁獲效麟振振而衆多吾師二十八詞館海內稱篇家
乙亥大考高等賚文幣者一充順天鄉試同考官者二
干將莫邪將成希世之器南金東箭盡交天下之英次
君孝廉君後弟一舉與兄兩難偉節虎怒於前慈明龍
鳴於後是知沈默名子都有深意勗勉命兒非徒勞力
猗歟黃衣童子四世定祥雞窠小兒厯劫難老矣孝則
感神德必得壽吾師顯而揚之以壽太夫子繼志述事
之媿也太夫子推而不有以壽布政公善則歸親之悃
也在昔拯始及第奉養不出建老白首萬石無恙世所

豔稱庸足方諸詩既醉之篇曰孝子不匱永錫爾類謂以孝道轉相教化也其八章曰釐爾女士從以孫子言妃耦有士行以生賢智之子孫也君子萬年君子萬年意在斯乎

李肅毅伯相國太夫人八十壽序

代

肅毅伯太夫人年七十五時以皇太后聖壽節拜御書珪幣之賜越五載春秋暨於八十列侯九卿二千石以下率郡國守尉民齒有德者絕域諸國歸附者相與稱曰至哉坤德之大也富媪宅奧產谷者麗山璇星坐宮傍斗者婺女是以赤光堯瑞扶始升邱以生繇白氣湯符伊水夢神而孕摯火正翼運兩脅各出三人南宮世官四乳遂鍾八子故知徽音作則文母入於周雅

燕喜流徵壽母勒爲魯頌貞元會合非偶然也三軍之士乃肅拜曰陰律調而歸昌和烝乂諧也孝德明而恪草秀援神契也然則握金母九光之籙虞受珠鰕藏上元八會之書漢徠天馬庸止飾鍾郝之禮法揆衛霍之勲勞已哉當夫璧澄華渚月祕中閨答道欲代子騫作誦獨好吉甫稠人坐上能別公輔須糜方寸圖中盡繡山川形勢光祿公慎於擇對就而問名勲格傳家英公特由賜姓儒宗辨耦帝畧自異真源吹律而知後嗣之蕃決著而得賓王之瑞爾乃夢探寶緯象苦縣之索男夜秉讖文兆李氏之爲輔紫氣光融於胞色雷精感會於胎生鼓角陰鳴貂珥潛拾佐餒切肉而宰天下之道平出游埋蛇而有陰德之報大駟至元黃戰血丹青寫

形晉鄭同支豹狸一族然而加士行之羽葆教始莖芻
開萊國之旌麾功由舉稗道光之季咸豐之初元二灾
年百六厄會智高自王邕管大彤實迫臨菑地公將軍
緣黃巾而樹幟從事卒史別赤眉而雜號火及朱雀妖
扇蒼鷺光祿公以爲睢泗之交劉項久爲戰地南北相
距盧舒宜列重防歸作州兵出參戎幕倚角甫立辰尾
遽歸其時相國兄弟射竹彎弓早度虜勢開松取劍思
竟父功然使太夫人略存投杼之疑間下牽裾之泣則
道南宅徒乘載且就曲阿夜半檄成流涕難言東海而
太夫人毀家紓難賦詩同仇謂難事勿可易言者名子
之裘治也當歸不如遠志者忠良之葆就也遂制短後
之衣以便軍被左開之襦而飼馬發上谷突騎伯昭用

破邯鄲解西平佩刀元直卒戡淮蔡

仁廉

等與清吳會

從下齊城往往密使入軍命推牛而享士諸婢習戰欲
乘陴以助威蓋礪山帶河之誓成實先國後家之訓立
彼襄平起事商略封侯荀羨殺賊張皇掩口方斯蔑矣
天下既定 朝廷申畫郊圻綱紀江漢詔征南以將軍
開府控制荆襄臨淮以中書押班都督幽冀兩鎮擁而
璽封迭拜二馮代而親舍不遷斯時也就丞相於邸將
元夕親導綵輿隨阿兄之官亦百里特設青氈豈不足
躬珪上壽畫錦記榮而太夫人守先姑之箴若嚴君之
訓雋不疑之行縣聞平反而始喜鄭善果之聽事坐胡
牀而察言入府則織純勗廉歸里則封鮓下教蓋講老
氏而得止足之心法廬江而立慈明之準焉相國既久

鎮燕塞晏化流孚萌業炳亦且厯三考聞九州而乘舟
日月之旁捫天正色攬轡太行之麓望雲孤飛頗欲拜
表陳情上詩將母太夫人手書止之曰方今 沖聖垂
袞 媯皇鼓簧而女受鼎阿之寄秉鈇鉞於外惟是夙
夜業業惕春冰之危陬溼喁喁就冬日之愛庶幾塞負
子責揚我后休乃郡國飢者一百餘縣風俗殊者五十
五種宰相之職當問天下中國有人斯攝外夷汝所以
慰倚閭助加餐者當何如耶勉之毋念我也相國敬受
教益播遠譽宏實績令公單騎而回紇羅拜使者一節
而太倉大振此則毗舍利城望母夫人而放仗琅琊王
國賴女司馬而散糧者矣然 天子亦微知公家事優
高年示體恤叔子遂盤谷之初長公回蜀道之馭或吏

或隱金孝全忠故齊賢來而九重羨汝母之福高涼
封而諸洞憚譙國之威焉以三月三日觴於里第臣繇
五熟之釜驛馬遺羹孺須九張之機冰蠶獻錦太夫人
珠簪紺幘絳節瑤幢負牀諸孫亦列綬笏隔江官屬爭
致颺頌樂可知也然而壽人曲古合鏡吹而聲高雲母
輦成副武剛而鋒駛固知郭家將校許奉沃匱而前漢
代羽林能識孝經之旨仁康等雖椎魯不學其能已於
言哉十年之中皇上奉寶慈壽長信極北極朝
東朝五旬之宴兩開萬年之觴具舉而興慶一品重
賜揄衣宣文九十特立絳幔望鉤鈴之耀明扶玉杖以
式燕仁康等將益竭鄙僊之詞以上揚聖主錫類之
仁下示百僚奉親之則曰惟太夫人福德亦曰惟相國

兄弟之光榮

顏母李太夫人七十壽序

聞之星軒月室儷乾符而扇輝震聲坎光稟坤神而縣
枯是以幔紗綴解宣文宗其經彤管流徽都水首其傳
世之頌珈笄貴掄狄石窳建邑延鄉紹封金松綺柏之
辭朱鳥斑麟之祝凡里耳所奮迅庸閭儀所矜式故知
義宗表宅匪恃釵鋌耀首壽人在房勿獨角祉合律稽
命券於定性糾齡基於善根而況苦縣神苗被服安息
之國巴山靈脈培壘懷清之臺如我顏母李太夫人者
乎太夫人累葉席芬六行秉淑幽閑衷其善心情愜粹
為士行韶齷慧照動與禮游弱笄溫和靜以義立凡奠
矧戮俎之職女師德象之篇淇泉瑳儺之容蔡國纂組

之巧咸協嬪則斯挺閨英會資政公長篔簹輟傷香纓修
聘景厥四德御之三周反馬儀成弋雁歌作投畚而偕
隱對春而不恆流芼思賢僅祁屏師蓋晨蠲概散舉門
內之政而春潤毫素流盤中之詠焉時則聘三都轉年
裁四齡呱泣投懷嬰媿學語即栴花之泯怨庸梓樹之
孚誠而太夫人作襦以溫之和丸以苦之幼而髮鬢治
挖禿以無嫌疾當醴灑劑藥裹而彌摯殫究荻畫宛轉
萱暉遂使公權孝謹姻屬疑為薛生謙之摩撫兄弟皆
如李出晉左九嬪贊曰至哉繼母行合典經其斯之謂
矣資政公坐有揖客門多長者調鯖時致君卿下榻或
禮孺子時則燭奴燈婢奉澡器於前龍媪鴉娘典饌部
於後肆筵歌嘏辦粥咄嗟太夫人猶懷截蔥之矩嚴還

羹之戒脫作之品必謹其和燂熬之珍咸理於手助筮者承其共閑家者式其教焉先是資政公家本儒素用計然之餘策法孔氏之雍容謂富在儉力不必歲司鳩羽物易所鮮至用穀量馬牛於是畫地錢流掬波珠熟心劬廉賈目側研桑自太夫人之來歸也發奩助裝焚券市義課賺土之鎗戶增鹵水之竈籌擔泉販稷之約決券於滄上稜薑求卮之利縮穀於襃斜蓋不數年而銅且累山寶皆馱井焉太夫人乃慨然曰聚焉無散者倚魁之行也散焉勿道者刀墨之民也自吾來顏氏竹入萬个漆且千斗詎用財自衛下儕洒削鼎食冒脯連騎者耶乃開瑞室拓福街甦瘁羽於澤中游困鱗於轍底割上腴以廕族續命營田血柔毛以具簋通賓置驛

壺飧僇飯吸汁者麻集仁粟義漿待炊者鶴望用是嫻
孀述懿崽子噓仁妯姆蔭其大雲侮甬沐其德水蓋家
糧振貸生兒皆以孔名而楹誥型宗舉國皆推顏訓者
已且夫氣母煦陽斯嘉蕤戴角富媪流化斯瓌寶孕奇
玉榮騰於鍾山珊柯交於渤海厚德所鬱餘慶用積聘
三都轉武功列爵勳格標門坐綰鹽屯實領綱部而叔
豹獻賦入等稱真秀才季熊急公輸邊亦假司馬期門
宿衛顏高競傳六鈞博士弟子范喬親受一研雍雍焉
烝烝焉前輝後光文通武達方謂何策萃甄揚環鍾異
庸知捐金笥底麴昭始多異聞聽客窗前密學實由內
訓蓋至萑釵就列鞠衣耀華郡君之封璽書五色天姥
之宴鼓吹兩幄而太夫人之心始慰矣而太夫人之力

彌劬矣今年爲太夫人七十壽辰史克作頌臚燕喜之歌齊賢侍側拜龍光之寵修德獲報美意延年理固然乎某等夙景芳徽深飫穆行勉申惶引用祝曼延將見斗溢鶩漿管諧鳳律迦留乞麪態盈獻襪叩竹刻杖綏挑釘筵固知紺雪飛觴青霞騰爵掇飛花於晃朗仙更堅牢灑定水於菩提佛皆懽喜

李黼堂中丞五十壽序

夫喬木立國磐奠於世臣靈著測天兆朕於大衍自來合曜重光之會必有延禧建福之才鐫券河山比齡旗翼是以皋益帝廷父子玉苞奉圖義蘇累葉蕃侯璣衡扶緯鵠鼎絲聲於伊陟魚鈐闡祕於玗公中興赤伏之符耿侯一姓上清白環之讖揚氏三公靡不班序顛毛

齒崇駘背固知尊彝法物即壽寓之珍符也班劍盛門
皆國家之元氣也若乃家標六闕座列三貂出挾景
風隱含神霧君實五十姓名已入耆英柱下三朝史藏
皆浮仙氣者其惟我年丈黼堂中丞乎年丈以旄車之
世族降桴鼓之星精黃菌誕而慶雲承赤堇涸而寶鏐
躍九宗五正代作尸臣三筆六詩家崇雋譽受詩名宿
食餼上庠子幹游學之年已嫻將略伯言秀才之舉足
雄本州文恭公杖節開牙分經課子命侍官舍能讀父
書於是走陳寶之祠厯哀牢之國雞次負典龍威授書
詩禮旣其異聞湖海拓其遐想鬱鬱丹山之氣雛鳳爭
飛汪汪湘水之波叢蘭獨茂爵歸門子名動中朝珠庭
化齒之容琪樹瑶林之度舉佩刀而示客父乃西平誦

說命以朝天帝嘉蘇頌橋門釋褐便著繡衣樓艣渡江
自揮羽扇遂終生請纓之志正仲華服袞之年滕閣飛
雲森將軍之武庫庾樓歎月踞老子之胡牀當是時也
蒼鷺市地赤蛟舞波妖劍掩斗牛之光天栳指翼軫之
次遠則師乞遺孽退保餘干近則郭默殘烽旁窺滄浦
公乘織羅馬製短後衣蕭規繼以曹隨輸攻窮於墨守
持鞭作算地上之錢欲流杖策巡師軍中之績自挾
天子嘉之有督理糧儲之命鈇剗荒白亭毒遺黎履不
眴之縵田軫無蕪之毛稅黃籍白籍戶定三臬寬鄉狹
鄉歲均再易承建武度田之制上開皇減賦之書然而
杼柚內空扉屨外竭酒官茶使方表羨餘攤稅絕錢思
權貫率一旦罷春陵二萬斛減渭河三百艘恐芻橐不

供議過於泉府薤本未拔勢制於強宗而公孤誠格天
吁荼及物丹牒夕上力陳朝野便宜紫誥晨頒兼省江
淮庸調迄今過彭澤之里斗米可舂入廉使之倉紅陳
相委豈非都尉搜粟難封富民之侯使宅蠲租實操活
國之算哉於是行事署爲令甲治績榜於朝堂甫轉屏
藩旋權宣撫太尉戴頭而至氣懾驕軍斬王握手以言
力制悍將五申統律十部宣風遂蒙 特達之知大有
非常之用梅花庾嶺久經驛使班春細柳軍門更敷條
侯擐甲且夫洞庭千尺瀉爲渾淪衡嶽九面鬱其虬擘
故荆璆和璧岸芷汀蘭實炳英靈閒生豪傑莫周九鼎
晉鄭莘於同宗復漢五銖李鄧起於一縣公以申息故
族王謝舊家揆楚人安楚之常援相門出相之理非子

房之引退詎李廣之難封乃因泉石之膏肓忽中穀梁
之廢疾軍行迂道猶曳足而視師天眷長城頰燎鬚而
代藥 特恩給假用賦遂初乘少游之下澤不羨雲臺
傍何允之大山還巢瑞室植竹万个種橘千頭管花萼
之池臺疏平泉之草木花覆茵而泥飲平揖田家松賞
戶以著書依然儒者輯 國朝耆獻述略若干卷六丁
勞護太乙下窺弄墨晨書然脂瞑寫纂名臣之碑傳託
始建隆錄宰輔之編年告成嘉定凌轡班馬潤色唐虞
滿四天下爲書須彌一硯集諸博士而作陟理萬番以
視楚國先賢徒誇雲夢渚宮舊事僅記嚙熊者個乎遠
矣青士畢汗黃神獨鐫禹穴探書補陀挂席入谷而掬
初月登城而賦朝霞鴈宕龍湫補陸深之未記碧林玉

闕疑阮肇之已仙幾幾乎五嶽臥游一壺坐隱焉年伯
母姚夫人文手定祥齊眉習禮繡山雲於法服潔荇藻
於扶筐幼梅舍人以肯構之賢舉香薇省論齊年之雅
述德椿庭以三月上弦爲五旬雙壽設賓雲左右之幄
佩太霞迎延之符家慶扶鳩人殷沃爵大江東去爭唱
銅琶黃鶴南飛獨吹鐵笛將以寄祝芋園禮也惟是蒲
輪之徵時及於境上春秋之問旋逮於山中雖復衣被
煙蘿錙塵軒冕而籌邊樓上一品之集未成煨芋鑪中
十年之言行驗終九重之前席還八十而杖朝則夫
焜難金屏揆張牙板者不過霄路初枕雲緜片葉而已
車茵待參瓦缶妄奏所期綠髓制齡赤藤扶老節旄百
歲庶幾羅侯之築城桃李暮春仁想謫仙之高宴

李母徐太夫人五十壽序

夫祝曼延者炫掄菽之光華闡聖教者矜璽封之尊遂
世所標尚率在浮榮是以斟玉水叩瓊宮朱麟丹鳥之
辭金母瑤妃之頌往往爭操觚爵過溢緇繩不知震聲
坎光坤順承健松茂柏悅節苦斯甘貞木積於句萌慈
雲湧於膚寸丹穴振耀書法始懷清之臺絳紗授經姆
範徵宣文之傳惟其育源也厚故其炳慶也豐蓋福堂
壽車實崇仁之券紅冰白雪皆落年之方此豈鏗耀珩
璜揆張輦悅者所可同日語乎有如我李年伯母徐太
夫人者蓋梅生年伯之繼配而幼梅同年之嗣母也駒
王舊系龍女仙根頌椒獻於端辰賦茗編於內集守筆
硯爲博士饒有儒風屏釵鋌爲辱金常捐女次頻入太

冲之詠籍興王肅之門授尚書數篇不訛齊語課小山
一賦如讀楚辭固已端簡修儀莊妹協度及歸我梅生
年伯也十萬貫之金錢新裁駕綺廿五絃之錦瑟重續
鸞膠之手歸而室家宜祥女來而僕御喜鸞凰合奏笙
磬同音參和爲仁媿媿碩人之德善心爲窈循循師氏
之箴其時我年伯蓬山假歸節府省視每至秋窗校吏
官閣焚香未嘗不伴蓮炬而賡詩擘機絲而補袞一黻
一佩箴管觴燧之儀三滌三翻概散修蠶之器方謂樓
高寫韻殿倚集仙雙飛竝命之禽永結同功之繭矣而
乃賈生賦鵬空承宣室之知長吉乘驢竟作玉樓之例
甫營織室遽築仙龕桐只半生草成獨活種湘妃之竹
有淚皆斑刈燕姑之蘭無徵入夢天荒地老月冷風酸

豈不志決摩笄身拚化石而手調薑橘思先志之終湮
澤撫栢棬舉遺文而孰付於是銜碑忍泣佩玉卜良可
兒可兒誰應當璧之拜類我類我敢辭負襁之勞幼梅
舍人以猶子之情奉大宗之祀皇甫謐之出後不啻所
生諸葛喬之遣來親爲易字太夫人治疔分痛作襦取
溫晝荻授書無閒於昕夕開松取劍倍昂以箴銘卒使
芝玉扇芬瑤琳振采含章奮藻蘭成射策之年篤行深
中王吉明經之舉當其來游京國進直鑾坡制宮體之
文章濡毫機速飭內裁之袍袴鳴玉雍容見者謂超宗
殊有鳳毛識者謂仲郢倍嘗熊膽雖按圖索驥蒲梢暫
坳承華而躍冶騰精寶劍已于斗宿然則成榮公之器
宏滂母之恩者概可知矣夫一門六相冠鳥相望四世

三公賓舊接軌在常情必且郇廚設饌况穴課羸裁錦障以鬪豪數簾珠而課讀而太夫人儉能葆泰淡以養真女布男錢仍安儒素秦篝鄭絡彌課婦功雖副笄六珈而著簪戀故雖金釭二等而桑步忘劬及夫散贍六姻旁周合族散延資之庫廣續命之田衣作萬通褐父照其庇粟量四鬴壺士資其求則又惠問川流義聲颯起信乎金張之巨閥鍾郝之名門也至於雍穆傳家慈恩逮下花姑竹姆穆以清風燈婢燭奴涵之皓月范孫侍側撫硯而望成人虔弟拜前隔帷而講老子揆諸穆行何待瑣言今年六月爲太夫人五十壽辰幼梅遠致疏麻俾爲隍引論惟唐山之曲闕宮之詩義不取諛詞皆紀實用是彤史之媿取證於弦姻寶婺之輝延光於

楚望度靈飛而勿誦屏綏桃而勿陳爲之推獲福之由
明積慶之理證梵天之富貴慈忍佛尊繪法界之華嚴
堅牢仙大其亦與世之藻績其體被飾厥文者異歟所
願花盡恆春藕都益節乞麪之伽留俱至獻糜之牧女
偕來將見鳳吹流天鶩漿酌斗迎涼薦脯稽命成圖祭
戟門前更綽女宗之表藁砧山上初賡天姥之吟

陸星農觀察六十壽序

夫星沙分野光輝常接文昌務觀耄年才子例膺壽考
矧乃身名九老聞見四朝卷阿詠夫吉人臺閣尊爲先
輩真靈位業兼圖司隸之妻忠孝家聲更得許公之子
豈非門窺晃朗國住陀陟不假落年之方自提養生之
印者哉我年丈星農先生吳中著姓海內耆英家承佩

刀世衍符策太白指長庚爲字夢兆斯徵和仲應奎宿
而生門庭將大幼承母教能讀父書屑熊膽之丸鳴機
課讀發龍威之祕鑿壁分鐙固已外貫九流內括七緯
胸藏冊府口吐神珠始舉茂才屬興廉孝桂林並秀聲
名噪夫二難柳汁輕彈清異感夫九烈於是鴻臚初唱
鼇頂平躋論事於安福殿中拜命於大羅天上官燭輝
風簾之影寶書窺壁府之藏方謂出入金門迴翔丹地
平原作賦但從文苑稱雄內相居官將以翰林名集然
而陽劍八伏經辟灌而始純弨弓九和必榜檠而後勁
采雲中之挂餌何必蓬瀛服方外之丹砂還求句漏一
麾湖海山谷之守宜州十首歌行元相之乞外郡戲鶴
而去叱馭以行羅溪之碑版堪摩桂海之虞衡待補則

有湘撫毛公傾衿作禮飛耳審音上薦禰之書作借寇
之請謂鬱林石好不煩陸續重來而鈎鋤潭清還待柳
州作記迴憶鳴珂畫省待詔鑿坡給札讎書特疏離騷
草木傳衣授鉢早收楚國榷楠斯殆事非偶然而數皆
前定者矣一權鹽法再攝糧儲謹禹莢之司職包茅之
貢烏池考志赤埴分田吾子大男管仲稽二百鍾之數
河師門匠刁雍具六萬斛之舟不必井呪毒龍山行流
馬而波熬萬竈已無學士之鹽身負一囊自湧太倉之
粒雖席據難煖曲好易移而泉隨房豹爲甘鹹珠逐孟
嘗而來去幾幾乎免胄之望挾纊之恩焉時以水衡用
匱邊糴費繁稍收畸零之錢略開折博之務先生謂紬
布列肆即同周禮征廛平準成書易啟桑兒言利於是

魚租鴨稅悉屏苛煩竹屑木頭咸歸擘畫粟搜都尉葦
納司監法無貼射之訛庫有延資之益蓋日要月成之
畢會仍閒架除陌之不興說者謂先生首掇大科素推
公望早合花繁旌節亦當詩滿轎軒乃從文中游者比
牒已多將相同高允徵者連名半屬公侯事有類於積
薪官尚等於執戟未免葫蘆下問屈士龍之名高舞袖
微張厭長沙之地小不知孔門德行不敘官階沂國平
生豈在溫飽不清不濁汪汪千頃之波亦介亦通落落
一時之概水惟升斗而待之舉火者五百家位廁屏藩
而與之忘分者七十士引謙虛爲坐薦被禮義爲繡裳
忘世味之酸鹹穆宅心之醴粹內行彌篤外慕胥相兼
之學配經神記羅墨妙古器能知服匿書法獨悟渾脫

帖辨一驚甄珍五鳳訂沮誦佉盧之字著凡將急就之
篇凡夫宋公誣鍾甄邯銅斗安釐王之故簡顯節陵之
冊文靡不洞源審微研閱窮照夢中篆籀映腸胃而皆
明座上鼎彝對鬚眉而盡古勿酬終北之神漢勿跨汪
氏之龍魚而瓦當自足延年簞簋咸銘眉壽又豈止魯
望書成笠澤陸义人號石經已哉年伯母徐夫人芬惠
翔聲形華散譽紀姑恩之曲櫛縫升堂修母則之書笄
珈偕老行推命婦膝繞珠胎季虎頭龍子皆肯構麤麟
雛鳳孫亦負牀歲在端蒙年齊大董碧筒泛酒黃花送
香自鑄乙尊長生無極並書亥字相視疑年躋虛獻縞
而來伽留乞麪而至風搖音樂雨散曼陀樂可知也韞
石同年夙承庭誥方直詞曹以家學淵源備承明著作

中朝交許謂得光祿之文官舍重來并少胡威之絹屬
以介壽之辰特乞省親之假望衡山之雲遠指南極之
星明_論等與福時之佳兒幸聯鴈塔以孔融之後進夙
仰龍門有願登堂無因奉席謹獻三多之祝敢書十樣
之牋所冀靈壽杖高恆春樹靄百齡大耋尚擁羅侯城
上之旄一曲新聲遙吹李委腰閒之笛

葦灣游記

客有緇葦灣者半郭半郊幽曠無景一花一葉清泠見
底無城市之囂有江鄉之美心嚮往之逡巡未果也既
逾觀蓮節同人瞿然歎侶命傳刻期戒旦曉陰壓簾忽
潤柱礎急雨打衣已作荷聲詩待天催路憑風引於是
長者著製幼者駢乘連軫以往出西郭而南遙空如晦

彌望無際枯禾油油若渴得飲古木簸簸不秋自爽松
當道而人立塔搖鈴而禽語有負薪避樹下者就而詢
之曰是矣數武而近雙眸忽明行疾視徐煙空波遠娟
娟猶露亭亭不風笑靨微呈頰頰而歛步苦心自捧靚
粧而凝淚目交花南神盪葉北志高曠者興君子之思
寄沖穆者動伊人之慕焉溪流乍湍徑滑難步客車偃
仰如橫岸船詩笠輕圓若交水蓋循坡而上有茅屋三
間主人葺以應賓者也大雨如注熱客不來昔苦偈仄
今乃深邃入室縱眺波光上櫺水氣升榻玉盤側注珠
瀉仍圓羅襦半解香生轉淡遠勢收於咫尺清涼貯於
方寸致足樂也屋南有亭欲登則怯竟捨未忍乃躡輦
底之屐欹墊角之中高年賈勇東顧藤而代杖健者窘

步當低枝而絳衣登斯亭也選石趺坐橫席雜次文楸
敲玉與松子而俱聲碧筩拗杯得花氣而已醉濕薪聚
而茗遲墜果拾而饌韻藕雪奪臂酌員暈胎笑攜柑之
迂不流觴而樂當門指網侈溪魚之可羹隔水呼煙惜
菱歌之無榜嗟嗟葦灣水不一勺花甯十里愛蓮之說
乃成於今茲聽雨之圖遂鍾於我輩殆八愚以柳州顯
三語以漫叟著者矣余也中年昆弟約連牀而仍別一
門老穉因泛宅而成家極目西子之湖睠言吳孃之屨
鷗酣昔夢馬蹴今塵可勝慨哉昧爽而往薄午而還爲
花祝延喜天漿之已斗爲苗甦息恐地澤之不尺二里
許入城飯於忍盦階水及屢解襪始升窗竹送秋入琴
可譜僉曰樂哉分體以詩抽毫斯記補花壽邪志兩喜

耶同游者柳堂圭盒伯潛仲勉可莊兄守一兄子安圃
期忍盒者曷莊燕民忍盒者可莊寓廬也

游葦灣後記

七月二日吳侍御集同人復游葦灣兄子人駿挈從孫
允言以從容非兼謨乃入香山之坐兒不文若亦參高
陽之星旭日始旦薄陰欲霽宿潤野綠猶有雨氣初晴
山黛忽變金色既至則雜坐隄角沿緣水隈秋士初浴
振衣而自芳水仙曉妝逼視而欲笑明晦遠近萬象渺
忽蓋行少昊之義氣香爍猶辛得直臣爲主人心苦不
死爲徘徊久之里老告余 純皇帝校獵駐此乃建斯
亭八觚高聳一角危峙瓦不玉葉冒匪銅沓是則曝背
而語金鑾恐非實錄閒坐而說玄宗自成野語余聞乾

隆中以河泊十三所隸之官此殆其一也營建中輟孤
存此亭露臺已罷之趾猶名其鄉良嶽未舉之石巋然
於道是說近之地屬奉宸苑責葦稅焉主人胥八十畝
而荷之蘭或遷鮑茅亦可荃衆枉蔓蔽在佩之者能擇
君子彙拔在樹之者有人主人有言相引已遠柳陰可
釣不必得綸稻花已香忽然欲飯下荻港徑蓮畦泥蘓
欲圻如行一木之橋波空自秋宛坐兩槩之艇蘆中呼
人水聲代答葉底捉蝶瘦影倒墜周谿以還日則逾午
飲於豆花棚下三爵旣進百態雜作次公醒狂況乃多
酌齊贅徑醉何必一石視酒若墨幾濡以頭見水如若
空搯其口酒酣以往臨流小步以朶頤之凶櫻滅趾之
咎嗟乎蟻封縱繼至康莊而墮馬千乘矯廉過豆羹而

動色失足之機乃在微忽可不慎哉可不慎哉歸來何時了不自覺車鄰鄰馬蕭蕭猶疑花神來嘲醉客伸足酣眠東方已白

蘭駢館記

姬琰齋中蓄蘭百本煙蕤旣晚風穗欲波時翫貞姿彌愜幽賞光緒戊子七月十四日馥馥一花垂垂交蒂香清益遠秀出天成姬琰生時嘗有斯異僉曰昔爲英媛之兆今其嘉耦之徵乎清露未晞神風若引余適扁舟來謁相國心焉奇之旣協和昏特甄靈貺命所居曰蘭駢館用嵇含伉儷篇意也以余狷潔無情名聲爲良谷阿失性霜風害柯縱無人而自芳殆之子兮日遠而相國矜茲姱節寵以沐薰迴孔操而琴諧解湘纍而佩結

南和芘於諸葛未害當門德曜對於運期奚嫌賃廡於
是扇裁比翼繭著同功朝潤襲裾夕芬入握每至光風
徐轉皎月初澄未嘗不攜手聯吟並肩按曲雖雙魚踊
躍兩鳥迴翔未足擬其深致也人既靜好花亦繁滋昔
生謝傅之庭今感羅含之宅暄滄異態高介自然夫木
以連理見珍禾以雙歧爲瑞斯公羊之善讖豈關雎之
好仇必若夢遇伯儵矜服媚於賤妾怨工平子嗟遲暮
於美人諒塵務之縈心并靈根之蒙恥今者垂條立幹
脩德蘊真即非王者之香諒在善人之室與子偕老不
采何傷易曰同心之言其臭如蘭我二人其庶幾乎

澗于集文下

終

先公奏議詩集書牘志潛俱已次第編刊文集獨遲遲
後出者先公駢散文存稿者較詩爲尤尠其搜輯較
書牘爲尤難癸卯大故以後志潛啟遺篋所存之文錄
有清本者僅十餘篇嗣後志潛向諸父執展轉請索
其經進文字復從內閣鈔錄歷廿餘年之久始成此編
其中所刊讀史記老韓列傳書後莊子楚人攷讀莊子
釋牧釋畜改字嗇夫說諸文皆就殘稿字疏句櫛清理
成篇然未敢僭易一字尚有讀莊子二一篇闡發莊子
責齊不助五國拒秦及齊楚絕交之失計稿太叢殘展
讀數十過旣無從爬梳又不敢增益祇能割舍又有灤
水攷一篇地在吾鄉文內有與吾歛黃山相似語又有
潘皆山約游溫泉語溫泉在遵化茅山之麓志潛預修

景陵曾往游焉 先公實未履其地而潘皆山者詢
之 父執多不悉其人此必爲友人代作審酌再三未
敢入集謹識其略以待異時之攷定讀 先公塞上日
記有讀莊子三四兩篇一取莊子與離騷互證一論孟
子與莊子異同此兩文今已無稿又讀 先公致陳歿
庵師書謂漢黨錮表唐牛李黨表宋荆温得失論元祐
黨人表此數篇稍有折衷之見今亦徧檢不可得其爲
塞外歸來由都而津而甯遷徙擾攘時遺失歟抑置諸
別篋志潛當時檢點未及歟今者滄桑再易金陵兩度
劫灰瞻望故園典籍蕩盡此數文遂僅存其目而不能
永其傳收拾後時志潛之罪也 先公在翰林駢文有
聲於時兼領撰文事供奉文字多 先公主之會畿輔

與晉豫大無爲 德宗擬祈雨關壯繆廟文署中本有
例稿 先公以壯繆習左氏文中悉引用左氏禱雨事
典重沈摯禱畢翌日大雨徧三省都下爭傳誦之其文
與他駢文合鈔一巨帙已卯春張文襄文借觀遂並亡
逸志潛官京師翰苑先燬於兵無由搜輯矣起居注歲
尾進書例有序言 先公壬午再直起居已權副憲同
直者度 先公無暇及此而進書之期已迫尚無創稿
者 先公乃援筆爲之文不加點頃刻而就衆皆悚服
志潛趨 庭時曾聞其事至京師乃得於內閣鈔副
先公嘗言壽文不宜入集然 先公駢文自爲文襄文
失去所存益少志潛所輯壽文又皆一時賢士大夫風
義所關壽朱外祖母馬太夫人文推明儉德以平津侯

王荆公爲僞儉適在甲申易樞之際不慊先公者謂
實隱譏閻文介公媒孽其閒文介遂與先公有隙尤
未敢任其湮沒編寫旣竣分爲上下二卷上卷爲古文
雜著附焉下卷則爲駢文憶幼時肄業學塾塾師課以
古文觀止簡練揣摩若不勝其興趣者一日先公至
塾援筆批其上略曰爲文當由唐宋上窺史漢旁涉周
秦諸子沿流溯源而歸宿於經訓乃能深造有得第佔
畢於八家之文猶末也志潛服膺弗敢失因悉讀班馬
之文上及管莊荀列雖未能研精覃思然所見已稍異
流俗遭時喪亂衰朽無成而當此學風囂雜之時文字
派別尚不至蕞無適從者聞於庭訓素也厥後志潛
所讀古文課本以授弟沂辛亥之亂未及攜出遂燬於

兵 先公手批之語亦僅識其大意然 先公爲文之本旨可於此窺其崖略矣付梓告成以武進陳容民文彙在津門爲 先公論文老友素相訢契洸其作序卷端而志潛謹自志其排比搜輯大略如此蓋距 先公棄養二十有五年矣丁卯暮春男志潛謹識